



# Alba: Sàr Dhùthaich nan Tachartasan

Geàrr-chunntas: Ro-innleachd Nàiseanta  
Thachartasan na h-Alba 2024 – 2035

Gheibhear geàrr-chunntas san sgrìobhainn seo air an tionndadh ùr de  
Ro-innleachd Nàiseanta nan Tachartasan. Gheibhear an ro-innleachd shlàn [an seo](#).

## Tha an ro-innleachd gus taic a chur ri roinn thachartasan na h-Alba soilleir agus a' cur amasan àrda romhainn.

### An Lèirsinn


Gum bi Alba na Sàr Dhùthaich airson Tachartasan

### An Ceann-uidhe

Roinn nan tachartasan a ghleidheadh agus a leasachadh, tro bhith ag obair mar Sgioba na h-Alba, roinn a tha neartmhor, daingeann agus cunntachail agus a tha aithnichte mar roinn fìor shoirbheachail gu h-eadar-nàiseanta agus a chuireas taic luachmhor ri eaconamaidh a nì feum do mhath dhaoine ann an Alba. Thèid seo a choileanadh tro bhith a' cur air dòigh taghadh sàr-mhath, eadar-dhealaichte agus in-ghabhalach de thachartasan cultarach, spòrs is gnothachais – do chom-pàirtichean, luchd-obrach, coimhearsnachdan, agus luchd-tadhail.





### An Ro-innleachd

Gus an lèirsinn agus an ceann-uidhe a choileanadh stèidhichte air trì **raointean eadar-cheangailte**, agus tha **prìomhachasan** anns gach fear:



## Na Builean

Tha na **raointean eadar-cheangailte** is **prìomhachasan** san ro-innleachd glè chudromach dhan iomairt gus suidheachadh a chruthachadh san urrainn dhan roinn cuideachadh le bhith a' coileanadh prìomh bhuilean nàiseanta mar phàirt de dh'eaconamaidh a nì feum do mhath dhaoine ann an Alba. Le bhith a' coileanadh na ro-innleachd, nithear cinnteach gun tachair na leanas:

Prìomh Bhuilean Nàiseanta	Builean Roinn nan Tachartasan
 <b>An Eaconamaidh</b>	Tha roinn nan tachartasan air stèidh ionmhasail dhaingeann, sheasmhach, agus a' fàs. Gheibhear buannachdan eaconamach nach beag aiste air feadh sgìrean is eileanan na h-Alba agus airson na dùthcha air fad.
 <b>Coimhearsnachdan</b>	Tha tachartasan a' cur taic ri slàinte chorporra, inntinn agus shòisealta dhaoine agus ri math dhaoine is choimhearsnachdan.
 <b>An Àrainneachd</b>	Tha roinn nan tachartasan a' gabhail cùram mun àrainneachd agus a' cur an sàs eadar-ghluasad cothromach gu Cothromachadh-carboin.
 <b>Luchd-obrach</b>	Tha roinn nan tachartasan na roinn tharraingeach airson obair le modhan-obrach a thaobh Obair Chothromach gan cur an sàs airson an luchd-obrach, agus mar thoradh air sin bidh guth buadhach is tèarainteachd aca, bidh tlachd san obair aca agus cothroman, agus nochdar spèis dhaibh.
 <b>Cliù is Ìomhaigh</b>	Gheibhear tachartasan air leth math a nì taisbeanadh air Alba, ar luachan, agus ar stòrasan air feadh na cruinne, agus a chuireas ri ìomhaigh is cliù na dùthcha gu nàiseanta is gu h-eadar-nàiseanta.



## Gach Buil is Buannachd Thuige Seo

Tha ainm aig Alba gu h-eadar-nàiseanta mar thè de na dùthchannan as fheàrr airson tachartasan. Bidh tachartasan cultarach, gnòthachais agus spòrs cho math 's a th' ann, beag is mòr, gan cumail fad na bliadhna air feadh na dùthcha sna h-ionadan iomraiteach is àiteachan anabarrach brèagha againn. Tha spèis aig daoine air feadh na cruinne do ar cliù ionmholtair airson inbhe is meud nan tachartasan againn agus ar cuid chomasan gus an cumail. Tha Ro-innleachd Nàiseanta nan Tachartasan air a bhith aig Alba bho 2008. Tha an iomairt chunbhalach, ro-innleachdail is leantainneach seo gus roinn thachartasan na h-Alba a thoirt air adhart sna fichead bliadhna a dh'fhalbh air cruth-atharrachadh a thoirt air cùisean.

## A' cuideachadh gus atharraichean buannachdail a chur an sàs

Chan e a-mhàin gu bheil tachartasan a' toirt chothroman sàr-mhath agus brìoghmhor do mhuinntir na h-Alba agus do luchd-tadhail, faodaidh iad cuideachadh le bhith a' cur atharraichean buannachdail an sàs ann an iomadh raon. Tha iad mar mheadhan buadhach air fàs san eaconamaidh, bidh iad a' sìneadh tarsainn air crìochan de gach seòrsa, cuiridh iad ri moit dhaoine mar shaoranaich agus luchd-dùthcha, agus cuidichidh iad le bhith a' lorg fhuasglaidhean do dhùbhlain eadar-nàiseanta leithid a' cuideachadh le bhith a' coileanadh Cinn-uidhe Leasachaidh Sheasmhach an UN.

## Atharraichean san roinn

Ged a tha roinn thachartasan na h-Alba air soirbheachadh gu mòr thar nam bliadhnaichean, tha dùbhlain mar

nach fhacas riamh air a bhith ann o chionn beagan bhliadhnaichean. Tha comas is seasmhachd roinn thachartasan na h-Alba fhathast fo chunnart nach beag ri linn leithid a' ghalair mhòr-sgaoilte, mar a dh'fhàg an RA an Roinn-Eòrpa, staing na cumhachd (dealain, gas is eile), gainnead luchd-obrach, gainnead sgilean, riaghailtean ùra, agus nas lugha maoineachaidh agus buidseatan nas lugha san roinn phoblaich. Tha barrachd farpais ann cuideachd bho chinn-uidhe eile san RA agus thall thairis.

Ge-tà, thig cothroman an lùib dhùbhlain. Fhad 's a tha eaconamaidh na cruinne a' sìor atharrachadh, tha roinn nan tachartasan a' cumail oirre le bhith a' dèanamh làn-fheum de leasachaidhean teicneòlais ùra, a' coileanadh bhuilean thar ghrunn raointean poileasaidh, agus le bhith a' stiùireadh adhartas mu choinneimh phrìomhachasan leithid a' bhith a' gluasad gu ruige cothromachadh-carboin, Obair Chothromach agus a' cruthachadh comann-sòisealta a tha nas eadar-mheasgaichte is nas inghabhalaiche. Tha an roinn glè chudromach cuideachd nuair a thig e gu bhith a' brosnachadh co-chonaltradh eadar-nàiseanta, a' toirt chothroman do dhaoine beachdan-smuain a cho-phàirteachadh, a thaobh co-obrachaidh chruthachail is chultaraich, agus a thaobh cheanglaichean dioplòmasach.

## Amasan coitcheann

Tha Ro-Innleachd Nàiseanta Thachartasan na h-Alba 2024-2035 a' togail air beachdan bho cho-chomhairleachadh poblach is co-chonaltradh farsaing le luchd-ùidhe a chaidh a chumail ann an 2023. Tha i air a dealbh gus stiùir leantainneach, ro-innleachdail a thoirt dhan a h-uile duine a tha an sàs ann a bhith a' planadh, a' cur air dòigh, a' toirt taic do, agus a' libhrigeadh thachartasan de gach meud ann an Alba eadar seo is 2035.

## Nearnan sònraichte

Tha grunn nearnan sònraichte aig Alba a tha gar fàgail mar Shàr Dhùthaich nan Tachartasan. Tha iad sin fìor chudromach do mar a tha sinn air aon de na dùthchannan as fheàrr airson a bhith a' cruthachadh agus a' cumail thachartasan. Nam measg tha:

- Ar Daoine
- Ar n-Ìomhaigh Chultarach is Dualchas
- Ar n-Àrainneachd Nàdarra
- Ar Goireasan Togte
- Ar Tachartasan Suaicheanta
- Ar Comasan is Cliù Acadaimigeach is Roinneil

## Eileamaidean Ro-chudromach

Cho math ri ar prìomh nearnan, tha taghadh de dh'eileamaidean ro-chudromach a dh'fheumas a bhith ann ma tha sinn a' dol a thoirt ar lèirsinn gu buil gum bi Alba na Sàr Dhùthaich airson Tachartasan:

- Amasan Àrda gar Sìor Stiùireadh
- Oidhirpean Com-pàirteach le 'Sgioba na h-Alba'
- Guth Làidir airson na Roinne
- A' Co-fhreagairt aig ìre Ro-innleachdail air ro-innleachdan nàiseanta is sgìreil
- Plana Gnìomh Soilleir a Ghabhas Measadh

## Coileanadh

Tha trì eileamaidean soilleir, eadar-cheangailte ann a thaobh a bhith a' dèanamh measadh, aithris, agus ath-sgrùdadh air soirbheachas is adhartas:

1. A' cur an cèill mar a chuidicheas roinn nan tachartasan le bhith a' coileanadh Phrìomh Bhuilean àrd-ìre Nàiseanta.

2. A' cur taic ris an roinn gus modhan measaidh, luachaidh agus aithris nas fheàrr a chruthachadh gus an gabh luach dha-rìribh nan tachartasan a chur an cèill, agus gus am faighear fianais air mar a chuidicheas iad le prìomh bhuilean nàiseanta.

3. A' measadh adhartas leis a' Phlana Gnìomh a thèid a dhealbhadh gus obair a dhèanamh mu choinneimh nam prìomhachasan a chithear san ro-innleachd seo. Bidh gnìomhan ann airson gach prìomhachas a chithear san ro-innleachd shlàn.

## A' Dealbh is a' Coileanadh a' Phlana Gnìomh

Gus dèanamh cinnteach gum bi e soilleir dè tha a dhìth agus gu bheil cunntalachd ann, thathar an dùil gun tèid plana gnìomh mionaideach a dhealbhadh airson na ro-innleachd seo. Thèid sin a dhealbhadh is a chur an gnìomh fo stiùir Buidheann-chomhairleachaidh Gnìomhachas nan Tachartasan (BCGT), còmhla ri luchd-compàirt. Bidh a' bhuidheann sin a' cur aonta ri modhan-measaidh agus a' cumail sùil air adhartas gu cunbhalach.

## Ath-sgrùdadh

Chaidh an ro-innleachd seo fhoillseachadh as t-Earrach 2024 às dèidh co-chomhairleachadh farsaing. Tha i a' gabhail ealla ris na dùbhlain is prìomhachasan a bha ann aig an àm sin. Tha e airson na h-ùine gu 2035 le cothrom air ath-sgrùdadh ma bhios sin a dhìth.

